

Jahresbericht der Präsidentin

Ja dä Bricht wird definitiv churz, us bekannte Gründ het nid vii stattgfunde im 2020. Um nech nid unnötig dra z'erinnere, wird i nid jede Alass wo hät söüä stattfinde nenne u när aus leider abseit deklariere, sondern i konzentriere mi uf das Wenige wo im SGV het chönne stattfinde.

Ad GV vom 2019 hani sehr positivi Erinnerige, es het alles iwandfrei klappet, mir hei vieli jungi Turnerinne dörfe i Verein ufnä u es hei o vieli d'Kampfrichterusbildig erfolgreich abgeschosse. O dr gmüetlech Teil isch nid z'churz cho u es isch eis vo de letschte Mal gsi, wo soviu imne Restaurant hei dörfe zämäsitze...mir heis gnosse.. u o einigi vo de sehr «Junge» si de no is Pub gwächslet, was mir ja o verstöh 😊.

D' Gruppene vom SGV hei weni Halletrainings im 2020 chönne absolviere - es hei o keni Wettkämpf stattgfunde.

Am 10.Juni heimer dr Turnbetrieb dörfe ufnä u das isch super gsi, Turner u Turnerinne hei sofort neuu Sache afa lehre u das het mi extrem gfreut.

Am 1. Juli hei mir üs zum traditionelle Brätle ufem Helvetiaplatz chönne traffe u das isch i dem Jahr scho sehr speziell gsi. Kids heis aber wie ging gnosse im Wald umezrenne, es isch wie immer ä glungne Abe worde. Nachdem schöne Brätle si de alli id Summerferie.

Nach de Ferie heimer sogar no witer ir Halle dörfe trainiere.

Vorstandssitzige si das Jahr sehr speziell gsi, di 1. heimer la usfalle, die 2. heimer när per Mail abghandelt, im August heimer ganz ä normali Sitzig chönne ha bir Bea dehei u si när no uf Solothurn ga z'Nacht esse. Das isch sehr ä schöne Abe gsi. Vo dert a heimer när müesse uf Zoom umstelle u das het ganz guet klappet. , -)

I bi sehr dankbar um mini Vorstandsmitglieder, mir si es tolls Team u finde o ä gemeinsame Nenner we d'Asichte nid immer vo Anfang a genau glich si. Mir chöi offe u ehrlech diskutiere, das isch sehr wichtig für ä gueti Zämänarbeit. !

Im Oktober si Zahle wieder gstiege u dr SGV het per 23.10 beschosse, keni Halletrainings me dürezführe.

I danke allne üsne Vereinsmitglieder für ihres Vertraue, wo sie üs entgäge bringe. Mir freue üs über jede Zuewachs u jedes wo sech dank em SGV bewegt. Mir hoffe, dass dir uf üs zue chömet, we dir Alige heit, wo mir im Vorstand söüä behandle.

Fürs neuä Vereinsjahr wünsche i euch u eune Familie nur z'Beste, gueti Gsundheit u eifach chlei «Normalität» 😊.

Yess, i has gschafft, dä Bricht z'verfasse ohni einisch das ominöse Wort z'bruche, wo ja das ganze 2020 so prägt het.

Rüti, im Februar 2021 eui Präsidentin Sarah Dasen